

Borrokak bertze urrats bat egin duela adierazi du Koordinaketak

Hainbat sektorek presoaren errebindikazioak bere gain hartu dituztela uste du

Eneko Bidegain / Baiona

Koordinaketak ontzat jo zuen herenegungo mobilizazio eguna. Jean-François Lefort Lof bozeramaileak «presoaren eskubideen aldeko borrokak bertze urrats bat» egin duela adierazi zuen atzoko prentsurrekoan. Ipar Euskal Herriko hainbat sektorek borroka hori beren gain hartu dutela azpimarratu zuen. «Mobilizazio eguna ez zen helmuga, abiatzea baizik», gehitu zuen.

NIKOLAS PADRONES Hazparnen gose greban dauden bost kideen izenean mintzatu zen, herenegungo mobilizazio egunean parte hartu zutenen eskertzeko. «Orain da garaia presoaren eskubideen aldeko borrokan urrats iraunkorren egiteko», adierazi zuen atzoko prentsurrekoan. Jean-François Lefort Lof-ek, presoaren sustengu komitearen Koordinaketako bozeramaileak, ildo beretik jarraitu zuen. Sektoreen inplikazioa goretsi zuen, batez ere lizeoetako ikasleena, laborariena eta Hendaiaiko zenbait langilere-na.

Herenegungo mobilizazio eguna ez zela «helburua, baizik eta abiapuntua» gehitu zuen Koordinaketako bozeramaileak. Alderdi politiko eta sindikatuak presoaren eskubideen aldeko inizatiba berrien hartzeko deia egin



Ikasleek herenegun Donibane-Garazin egin zuten manifestazioa.

ANGELA MEJIAS

diete. Lefortek ez zuen alderdi politikoen eta sindikatuen artean iragan ziren bilkuretako parte-hartzea baikortzat jo.

ELBk, LABek, ACK eta Abokatuen sindikatuak ere bilkura batean parte hartu zuten. CFDTk uko egin zion etortzeari. EAJ, EA, AB eta LCR alderdiak bildu ziren bertze hitzorduan. «Elkarrekilako lanaren jarraitzeko eta hurbilketaren aldeko mozioa izenpetu ez dutenak arazo horren inguruan lan egitera ekartzeko borondatea agertu» zen bilkura hartan», Leforten arabera.

J. FRANÇOIS LEFORT

■ ■ ■ «Guztien inplikazioa behar da. Ez da gehiago aitzakiarik presoaren eskubideak ez daitezen errespetatu»

Lefortek lan ardatz berrien beharra aipatu zuen. «Guztien inplikazioa beharrezkoa da. Ez da gehiago aitzakiarik presoaren eskubideak ez daitezen errespetatu», adierazi zuen.

Donibane-Lohizuneko eta Angeluko herriko etxeetan kateatu zirenak txalotu zituen. Bi hirietako auzapezek —Michele Alliot-Marie eta Alain Lamassoure— ez dutela hurbilketaren aldeko mozioa izenpetu oroitarazi zuen. Hazparne eskualdekoen ekintza ere komentatu zuen. Mobilizazioetan parte hartu zutenek Hazparnen, Aiherran eta Lekuinen Hemen urrutzearen alde dira zioten pankartak jarri zituzten, mozioa ez zutela izenpetu salatuz. Bertze bederatzi herrietan, aldiz, hurbilketaren aldeko pankartak ezarri zituzten.

Bi 'demo' auzitan jarri dituzte

■ DEMOKRAZIA Euskal Herrian ekimeneko kideek beren mobilizazioaren balantze baikorra aurkeztu zuten atzo. Hamahiru ekintza egin zituzten. Horietarik ikusgarrienak bi demo-ren auzitan ezartzea eragin zuen. Irailaren 7an epaituko dituzte «hegazkin baten airebidea trabatzeagatik eta gune erreserbatu batean baimenik gabe sartzeagatik». Miarrizko aireportuan hegazkin baten gurgiletan kateatu ziren. Bortz urterainoko kartzela zigorra eta 250 000 liberako isuna (6,25 milioi pezeta) arriskatzeko dute, Poliziak jakinarazi zenez.

Poliziak bertze 11 pertsona ere atxilotu zituen herenegun, baina kargurik gabe aske utzi gero. Orotara 62 pertsonak parte hartu zuen herenegun Demokrazia Euskal Herrian ekimenaren ekin-tzetan.

Tren, hegazkin eta autobusen trabatzeko zergatia esplikatu zuten atzo. «Euskal presoaren familiak bide luze, nekagarri eta oso garestietara behartuak dira, oren erdiko bisitaren egiteko», salatu zuten. Kide batzuek esku-paperak banatu zituzten ekintzak egin bitartean. STAB autobus konpainia-ko eta Air France-ko arduradunei ere esplikatu zieten mobilizazioen zergatia.

Demo-ek euskararen eta departamenduaren aldeko ekintzak egiten jarraituko dutela berretsi zuten atzo.

Ostiraletik gaur arte 25 gazte itxialdian Donostian, presoaren eskubideen alde

Axun Erzibengoa / Donostia DONOSTIAKO 20 gazte erakunde eta taldetako kideak itxialdian dira ostiral arratsaldetik bihar arratsaldea bitartean. 25 lagun inguru bildu ziren Donostiako Parte Zaharreko Santa Maria elizan itxialdia egiteko, eta presoaren eskubideen aldeko astearren barruan kokatu zuten ekimena.

Sakabanaketa politika amaitu beharra aldarrikatu eta presoaren eskubideak errespetatzeko eskaera berretsi zuten gazteek.

Halaber, Frantziak eta Espainiak aldarrikapen hori ukatzen jarraitzen dutela azaldu zuten, eta Euskal Herriaren hitza errespetatzeko eskatu zieten. «Sakabanaketa politikaren erantzule direnek argi izan behar dute herriaren hitza errespetatzen ez duten heinean gazteok haien erantzukizuna salatzen jarraituko dugula».

Horregatik, ostiral goizaldean kontzentrazioa egin zuten Donostiako PSE-EEko zinegotzi Ernesto Gascoren

etxe atarian. Itxialdian diren bitartean giza kateak eta bestelako ekimenak ere egingen ari dira. Itxialdia gaur amaituko da, 19:00etan Bulebarretik abiatuko den manifestazioarekin. Bertan parte hartzeko deia egin zioten gazte orori.

Itxialdi horri atxikimendua eman dioten taldeen artean daude Donostiako Gazte Asanblada, IA, Haika, Teilatuka, Intxaurkaria, Mamarro, EHE eta zenbait ikastetxetako delegatu taldeek.



EDURNE KOCH

Gazte taldeetako ordezkariak prentsurrekoa eskaini zuten atzo.